

# الجواب الرابع / نبيله

٢٣ شعبان من عام ١٤٠٢هـ

الثلاثاء الموافق ١٥ يونيو لعام ١٩٨٢ م

إلى حبيبي مسعد

العامل في بلاد الثلج

في بلاد الواه

إلى الشاب الحليوه

حافظ هواه

إبن جارنا

اللي كان بيني وبينه من مسافه

شباكين وحدف طوبه

ويدوب نظرة لُقاه

أسمراني اللون

أخضراني القلب

يحرصه المولى لصباه

ثم أما بعد،،،

الدنيا يا مسعد بتغير أد ما بتغير  
لكن متهزش وتغير أولاد الناس  
وأنا وثقه إن أنت جدع وأصيل  
وملكش في شيء محطوط ف الكاس  
وعيونك مليانه براءه  
وجوابك كل ما فيه صادق  
لكن إياك من أي طريق  
فيه واحده تقولك نتصادق  
في رقبته أنا وأختك فته  
ونموت لو توعده وتفوتنا  
زاي ما سلمنا وقولنا تروح

وتسافر حبه بلاد الواه  
ترجعلنا كامل من كله  
صدق وجدعنه وحياء وحياء  
دي شروطنا اللي أنت رضيت بيها  
والغيره يا مسعد حواريهها  
ربنا يكفيننا يابن الناس نارها  
ولا يوم ننكوي أبداً بيها  
يحميك المولى سبحانه  
ويكفيك شر الأهل إن هانوا  
وتعود وسطينا بخير وسلام  
ببعتلك كل كلامي سلام  
يا حبيب القلب  
يا أصل الحب  
وتعود أيام السنه دي عليك  
والخير في إيديك

ورمضان أهو هائل ع الأبواب  
وأنا بدعيلك ربنا يغنيك  
ويجيك الخير من غير أسباب

من بلاد الأنتظار  
بشوق ولهفه  
كنت فاهمه وكنت حاسه  
وكنت عارفه  
إن نار البُعد تكوي مرتين  
وإن في غيابك  
هتبقى النار نارين

وسلام ختام  
وأبقى طمني عليك ونام كويس

